


# The Makuilongdi Express

Liangmai Daily Newspaper

"Mazibo niu ngamne"



Kadihipiri pakhiang naniu chakhuang thiubo khatdi India gu Father of Nation chiujiu siju bambo Mahatma Gandhi (Mohandas Kramchand Gandhi)tu chakhuang thiubo thiujui 153rd birth university hai India pabam hinangga mania khai mide.



N-danai Prime Minister Narendra Modi niu India ga 5G lepad lubo nai n-pamjiu India ga telecom firm dikachangbo Reliance Jio gu chairman Mukesh Ambani niu dinjiu 2023 December lungga India pabam hinaga 5G Jio dbukam miraye chiujiu din mide.

Zengtung 3 Chagaahiu 2022 Mennai Chiang PO Tamei ,Tamenglong Dist. Manipur Vol.01. Issue 11 Page 1

Palamra Chamai nahpiu sidi mawangra wangbo makge, chiudi maidung leng paringting pikhaira wangbo we. Mark 10:45.

## IRB recruitment khatdi tam-tambo government job result madu maji miraye. CM Biren.

IFP Bureau

Imphal. Cha. 2: N-danai Nidwannai Sewa Pakhwada, gu kaloibo ngamkam state BJP office, Nityaipat Chuthek, Imphal ga Chief Minister N biren niu tacham dinjiu, 10th nai 11th IRB result November 2019 ga recruit kamkhai bambo tuhoi katang result padmak bambosi majatbo lungga padmi sune chiujiu dinpad mide. Sironna makjiu tuhoi tam-tambo government chakam leng kamkhaijiu bambo dungdi watheng makbo lungkiga result pipad miraye chiujiu dinne.

Thailum N-bumhiu ga 12th Manipur Legislative Assembly 2nd session ga pawan thengjiu result patmak jiu bambo 10th nai 11th IRB result hai assembly loisai madupad mira bowe chiulu madu makbo jengniu CM ki katang protest thiujui n-gut tang khaimi bowe chiujiu dinne.

## Nagaland ga AFSPA khaisan botu NSF niu suinimakbo madu khai mide.

Nagaland Post

Dimapur:Cha. 2: Nagaland state pabam kasiaga Central government niu Armed Forces Special Powers' Act (AFSPA) chahiu charok (Six Months) leng khaisan lan botu Naga Students' Federation (NSF) niu suini makge chiujiu dinpad mide.

condt. P.2

## CMO office Senapati ga bomb puok mide



IFP Bureau

Cha.3: Senapati. Tadmibo Masannai n-chun wanchak 9 pm ningga palun simak mainiu Senapati Chief Medical Office (CMO) ga bomb thonkhai jiu puok masa mide, chiudi chamai ajam thiuniubo maksai kashaibo ra thiuson makge chiujiu tacham ga dinne. Chabam, mania kasiara kam masa mine chiujiu dinne. Health Minister S Ranjan niu dinjiu healthcare maitu haikumbo ngam kambo

hai disutah mibo ngamkam khatle, haikumbo tu aliu khamra kamraye. Senapati District Students' Association (SDSA) niudi Chief Medical Officer (CMO) gu office ga bomb khaibo tu tanjiu suini makbo cham madupad khai mide. paliugu chamga dinjiu haikumbo ngamhai tuhoi kenga tadtah mibowe sinu maihinang agi manaibo leng karam raye. Siriga n-kiujiu state government tudi majatjiu papou phiupat ra khengsan khai mide.

## Afghanistan capital ga suicide bomb kambo jengniu chamai 19 shai mide.



Aljazeera.com

Kabul. Cha. 1: Afghanistan gu capital Kubul ga tad mibo Nidwannai educational institute ga suicide bomb attack kambo gasu chamai 19 shai mide khatdi 27 san ajamme chiujiu United Nations Assistance Mission in Afghanistan (UNAMA) gu tacham

gasu dinne. Chamai waji keng makbo Hazara chiubo zatti khat hai kakengra Shiite Muslim maiye, chiujiu ariakky taiga ariak nahmai dungniu university entrance examination lengjeng niu kadenjiu banga suicide bomb kambowe. Situ suini makjiu Hazara zat gu maipui mai kakengniu chapiuky kajengga wangjiu "Hazara maitu kamsat tahlo" senjiu protest kamme chiujiu dinne. Souniu maksai n-debo jengniu chiubo tuhoi katangra palam silu makhaye chiujiu dinne.

## Uttar Pradesh ga tractor-trolley ajaiga juang khaijiu chamai 26 shai mide.

The Hindu

New Delhi. Cha.2: Ndahnai Chagaahiu zengtung 1st Nidwannai Uttar Pradesh state Kanpur district ga tractor-trolley ajaiga juangkhaibo gasu chamai 26 shaimide khatdi 16 niu ajam mathiujui ajam mide chiujiu tacham ga dinne. Sansabo doumai dunghai Chandrika Devi rahkiga kakheng thiura tad lujiu malan wangbo puitad gasu accident hai padmi bowe chiujiu dinne.

Prime Minister Narendra Modi niudi tacham chiu lujiu palung makbo cham hai poupad khai mide. Chiujiu paniudi kashai maileng Prime Minister's National Relief Fund gasu Lakh 2 hai pira khatdi ajam maidung leng sang 50,000, hai Prime Minister's Office lamsu piraye chiujiu senpad mide.

Uttar Pradesh gu Chief Minister Yogi Adityanath niudi palung makbo cham madu khai mide sigasu chariu magen thiubo dumai tu n-kha kasuisuibo jaiga nkha khaira chiujiu paniudi dinpad mide.

## Karingting Lunlung



###Aramgu chamsuiga mazari/ka-agari tu minwang maileng rangkang lakh mangiu pine sua, khe anaisan phui matai khe.

@@@Shia! haikhoi nah! Mazari/Ka-agari mai haisi sisai aram wang ping mede. Mahin phiura sang!



Kapang maitu apai-ari bammai wadoudi pamaning genglubo simakge.

Editorial

Tadmibo 2016 kum Iniu maning mousi maksai Senapati Liangmai Taphou ga aliu Liangmai gu zupou mai wang aruang lujiu Liangmai di tamsinjiu district khengkhe chiujiu chapkhai lujiu "Liangmai District Demand Committee" chiujiu kadak khaimi kumme. Chiudi tuhoi sibo committee hai n-de chiujiu changam tadkiu bamlo chiubo progress hai pawan wanga mathiu tu maning khaisai wilak mah chiujiu maning nge. Aliudi ai talih tanra pageng bammah chiubo Ira luwe . Makimai tu phui kadabo ga wangtang lakrabo tun gadi paliu talih tanjiu haichiu tak bambo gasu government di tanlakjiu paliu maning kakeng tathui lubo di bamme. Aliu di souniu munranjiu tadrato, mathak makjiu kheng bamsai naikhat makdi naikhat ra wa kawi dousu mah chiubo malumme. Naga gu solution wangdi hai, khatgu solution wangdi hai, chiujiu aliura pami bon makjiu bamra mah? Administrative block khat thiujiiu bamra di matanra pageng di bamme. Tuhoi aliu Liangmai tura A/C madai mangiu ga jan marapu khaimi khatdi district sum/madai ga zankhaimi State nia/ sum ga zankhai. Maning lujiu maning lan makum lujiu makum lankhe.

**Nagaland ga AFSPA khaisan botu NSF.....**

condt. from P.1

NSF gu President Kegwayhun Tep khatdi general secretary Shpuni Ng Philo niu tacham lumai khuga dinjiu Central government niu "law and order" problem tu madamjiu kambora Nagaland state hai tacheng kahabo khatdi chakhon chara kakengbo leng lukhai bambowe. Chiudi kadih mainiu sibamme Nagaland state haira kawibo khatdi agi manaibo tu luni maidung niu lung bambo kadihye chiujiu panai niu dinne. Siriga sanjiu Central haitu padbambo palingbo silujiu haibo AFSPA hai Nagaland state pakhiang gasu tingtheng jiu lupad mira Home Ministry khuga khengsan khai mide.

**Indonesia kadihga football mathenbo wan kabuak patjiu chamai 174 shai mide.**



NDTV.com.

**Jakarta Cha.2:** Tadmibo Nidwannai n-chun Indnesia gu kadih Javanese region, Kanjuruhan Stadium, Malang ga football mathenjiu bamga mathen phuira wangbo maidung kakga kabuakbo padjiu chamai 174 shaimide khatdi 180 san niu ajamme chiujiu tachamga dinne. Agi athoubo padbo hai local team Arema FC nai Persebaya Surabaya mathenjiu local team Arema FC tu Persebaya S u r a b a y a niu 2-3 ga ngamkhai bijiu,

ngam lakbo team niu mathen phung lungga ngutjiu kabuak hou mibowe chiujiu dinne. Siga police niu tear gas kepjiu hamara ra kambo gasu khatniu khattu tousat padbo hai padbowe. Siga police officer chamai khangnia di shaijou mide chiujiu dinne. Indonesia gu President Joko Widodo niu haibo lamga phiu masan lumak then Indonesia's Top league hinang mathak miraye chiujiu dinpad mide.

**Makimai (Meitei) tu Scheduled Tribe ga khailo chiujiu government tu tanjiu takjiu bam mide.**



IFP Bureau

**Imphal Cha.2:** Scheduled Tribe Demand Committee Manipur(STDCM) niu parit lulujiu Friend Union khatdi Yaipha Thouni Nupi Lup of Khurai Heikrumakhong aruang lujiu n-dahnai Khurai Heikrumakhong Imphal East ga paliutu (Meitei/ Meitei) scheduled tribe hangga khailo chiujiu sit-in protest kamjiu bam mide.Haichiu paliu niu democratic form of agitation kam khangbo hai naimikpui 38 tang mide chiujiu STDCM Youth Wing gu convenor N Edison niu d i n n e

chiudi state government lamsu tuhoi katang kak khai makjiu bammeh chiujiu dinne. Paniu dinjiu West Bengal ga bambo Kurmi zatti hai aliu makimai suang dam 20 kengbo zatdi scheduled tribe gabamra khengbogasuikhai bibowe. Haisi ronna makjiu tam-tambo India state ga di scheduled tribe ga joura haichiu matanjiu khengboga suikhai kambowe chiudi aliu Manipur haisira palamsikhai makjiu bamme. Siniu state government di aliu chamai machun sikhaijiu Meiteior Meitei tudi scheduled tribegu listga khai-khailo chiujiu paniu dinne.

**Pope Francis niu Putin tu chari mathak mira kheng khai mide.**



The Guardian

**Cha. 2:** Ukraine gu kadih naimik padlam bambo Lyman town hai masan siakjiu Russia niu khoilu mide chiujiu Ukrainian President Volodymyr Zelenskiy niu dinmide.Sibo town haisi tadmibo Masannai Russia niu pabam (region) madai khoi n-ggut mibo ruangga joubowe, chiudi Ukraine khatdi pagu allies dung niura sise mazi makbo we chiujiu dinne.

Pope Francis niudi Russia gu President Vladimir Putin tu tathu chara/chakhon chara patjiu kashai thiuniubo patjiu bambo hai mathak milo chiujiu khengkhai mide chiujiu tacham gasu dinne. Tuhoi charijiu bambo jengniu Russia niu control thiujiiu bambo Gazprom natural-gas haisi Italy leng pi mathak mibo jengniu tuhoi Europe ga energy crisis hai padjiu bamme chiujiu dinne.



English Premier league n-danai Nidwanai Arsenal nai Tottenham mathen boga arsenal niu Tottenham tu 3-1 gasu ngamkhai mide. Arsenal gu goal hai Partey, Jesus khatdi Xhaka niu chankhai ye khatdi Tottenham lam Kane niu chan khaiye.Haichiuja tuhoi tangbo thiujiiu arsenal niu kukachangbo boga bamme.

The Hindu

**Sikhaibo**

Chalad hai maiki lad gasu chalibo jengniu chali wangtang makbo bamtah lakge chiudi mathiu maning maji khaira kheng khaiye.